

Ich bin der / den all ding dunt drucken
Will mich recht inn winckel schmucken
Ob mich der esel wolt verlon
Vnd nit statts vff mym rucken stan
Wann ich alleyn gduelt dar zu hab
Hoff ich / des esels kumen ab
Soch hab ich sunst vil gfallen gut
Sie drucke alls das mich drucken düt
Als der nit volget gutem rott /
Wer zürnet / so es nit ist nott
Wer vnglück koufft / wer trurt on sach
Wer lieber krieg hat / dann gemach
Wer gern sicht mütwill seiner kynd
Wer halt syn nochbuwr nit zu fründ
Wer lydet das in druck syn schüch
Vnd inn syn frow im wynhuß süch
Der ghört wol inn das narrenbüch
Wer me verzert dann er gewynnt
Vnd borget vil / so im zerrynt
Wer zücht syn frow eym andern vor
Der ist eyn narr / gouch / esel thor /
Wer gdenckt die vile / der sünden syn
Vnd was er drumß muß lyden pin
Vnd mag doch frölich syn dar mitt
Der gehöret vff den esel nitt
Sunder der esel vff syn ruck
Das er in gantz zu boden truck
Der ist eyn narr / der sicht das gut
Vnd noch dem bösen stellen düt
Hie mit sint narren vil gerürt
Die diser esel mit im fürt

